

Kerwered `97

Inleiding

Gure Dach, ehr liewe Leid,
mer dets ball net glawe, awwer es is wirrer so weit.
Das wisse die Sachse, die Hesse unn Bayere,
die Reerer honn mol wirrer was se feiere.
Die Reerer Kerb is wirrer doh,
unn dismo werds noch besser wies ledschde moh.

Daß ner all wirrer do unne schdehn, das finn ich schä,
das hott met Sicherhät net nor am schöne Wedder geläh.
`Wie mer Reerer so sinn`, duner all wirrer erwade,
die dollschde Geschichte vunn unsere Kamerade.
Nor in derer Beziehung do kammer eisch net lowe,
es wern vunn Johr zu Johr wenischer Puscher unn Glowe.
Es liebschd hedde mer uns alles aus de Finger gesaucht,
weil zum schreiwe nix me do war, was mer hedde gebraucht.
Awwer zum Glick hommer jo noch e paar ohschdännische Leit,
iwwer die mer derfe berischde in unsrer Kerwered heit.

Daß die Red net so lang is, das is schunn net schlecht,
damit mer noch länger kenne genieße unser schönes Feschd.
Aus dem Grund hommer uns aach das Johr de Umzuch gespaart,
aach wann so manch äner hott ne sehnlichst erwaad.
Fer Esse unn Dringe hommer awwer beschdens gesorscht,
do hiwwe gibt`s Bier, do driwwe gibt`s Worscht.
Damit mer jetz awwer net de Faden veleere,
kumme jetz unser Iwwerzwersche zu großer Ehre.

De Reerer Schneemensch

Im Winder es zwar kä Kerb, awwer es is trotzdem e schänie Zeit,
weil iwwerall Schnee leit, weit unn breit.

Vor allem die Kinner honn beim Schliddefahre ehr Fräd,
do duhn ähm die Äldere schunn e bissje läd.

Die kenne nur Schelle unn meggere iwwer die Flogge,
odder sich dehäm vor de Flimmerkaschde hogge.

Wanns langweilisch is kumme die dollschde Idee,
fer de Fall das es kalt is unn wie bled dud schnee.

So isses ähm gang in dungelschder Naacht,
aus Richtung Eßwiller, glei näwer de Aacht.

Der war beim Edu iwwer de Backstubb unnerm Dach
unn hott sich Kobbweh iwwer was er kennt treiwe gemacht.

Wie er mol wollt außem Fenschder naus gugge,
do muschder vor Schreck se erscht emol schlugge.

„Ich siehn jo vunn do noch nemmo besse naus.

Ja, is dann schunn zugeschneed, unserm Bäcker sei Haus?

Wie kennt ich mich bloß aus dem Uhääl befreie?

Ich honns, irschendwo muß doch e Bäsem leie.“

Die Bä in die Hand, enunner in de Keller,
ich glaab, noch nie war de Schummi schneller.

Gesucht, gefunn unn ab werrer nuff,

„Jetzt mach ich se erschd mol das Dachfenschder uff

Wo fang ich dann oh? Wo isses am beschde?

Im Norde, im Süde, im Oschde orrer Weschde?

Ich denk das kummt alles uffs selwe eraus,

ich muß halt nor frei grie, das koschdbare Haus.“

Die halb Naacht horrer gescherrt unn gemacht,
es kunnt ball kenner me schloofe bei dem Krach.
Sogar drowwe uffm Sunnehof, do hot mer ne geheert,
die honn gemähnt, drunne im Dorf weer e Uglick basseert.
Wie es Dach endlich frei war, do waarer Schdolz,
awwer do war de Schnee sowieso schunn geschmolz.

Die Mussig schbeeld dem tüchtische Mann,
es geht doch nix driwwer, wie wammer was sinnvolles
schaffe kann.

Die 5 Schlammkädscher

Samschdach owend, is das so schä,
war das emol wirrer e oschdrängendi Woch gewäh.
„Wo kennt mer dann heit denne Owend vebringe?“
„Ei mer fahre uff e Mussig, dert kenne mer sogar singe.“

Dodezu hann sich fünf Jungs vunn uns entschloß
unn sinn emol schbondahn Richtung Godelhause geschöß.
Schunn im Audo war die Stimmung famos,
awwer uff derer Mussig, do war dann de deiwel los.
De Allgehohl muschd wirrer fließe in Masse,
ohschdoße, enin in de Kopp, is das net Klasse!?
Gedoobd unn gekresch, das hannse wie immer,
die Leid muschde denge, die Reerer, die wern ach immer schlimmer.

Die Mussig war ferr ehr Triewe noch fehl so korz,
awwer mer kennt sich jo veknieche noch annereorts.
Das hott mer sich so so äfach vorgestellt,
wäre nur net die Nadurgewalde in derer dabbische Welt.
„Es is jo nur e bissje naß“, hot änner vun ne erwähnt.
„es hot jo eischendlich nur drei Woche gerähnt.“

Met denne Worde is mer dann iwwer de Parkplatz geschlabbt,
awwer irschendwie hotz an de Fieß jo doch e bissje gebabbt.
Egal, enin in die Kutsch, de Modor ogeschmiss
unn ordentlich Kitt geb, uff derer Wiss.
„Ubs, was war dann das? Do fliehe jo die Brogge.
Es Erdreich war scheinbar doch net so drogge.“
Die Rääf honn sich als weider in de Borrem gegrabt,
daß hett vunn denne Borsche vorher ach kenner geglaabt.

Vorwärts, rickwärts, nix is me gang
De Fahrer kreischd ängschdlich: „Awei werd mers jo Angschd unn Bang!
Also, raus aus de Karre, enin in de Dregg!“
Es is awwer ach immer e Gemachs met denne Scheiß Begg.

Die Buwe muschde sich ganz schä dief bigge,
weil se wolde die Kischd außem Morrashd raus drigge.
Zwä ehalb Schdunn späder ware se als noch so weit.
„Ei das muß doch ball glabbe, jetzt werds awwer Zeit.
Ich gehn in die Hall, unn such mer e Mann,
der uns aus dem Schlammassel eraus helfe kann.
Der binnd unser Audo an seins hinne dro,
dann wern mer in Null-Komma-Nix aus dem Dreckloch gezoh.“

Was de Fahrer sad, daß werd ach gemacht
gehol horrer sich e Helfer zu derer schwieriche Sach.
Dem Redder sei Polo hat gewuhlt unn gescherrd,
es hot kenner me die Hoffnung gehatt, daß das noch was werd.
Awwer irschendwie honnses jo doch noch gepack,
er war hald e bissje veschmeerd, dem Opel sei Lack.
Doch dodevor gebtz jo Wasser, das hott schunn sei Zweck
ver Audos se butze, wo vergrab wern im Dreck.

Die Mussig schbeeld denne 5 Schlammkädscher zur Ehr,
wenn so e Parkplatz nur mo Geblaschderd wär.

Die Kraxler

Wann e Reerer e Rääs macht, dann kanner was vezeele,
awwer waaden mol korz, ich muß mer se erscht mol die Schdimmbänner eele.

So, weider geht`s, awwer wo ware mer bloß?
Ah, bei Reerer im Urlaub, do is immer was los.
Ob in Ägypte orrer an de Nordsee, wohi`s em aach zieht,
do isses ähm egal, ob mer fahrt orrer flieht.
E Grupp vunn Reerer hott sich fer Österreich entschloß,
so sinn se noch in de selv Woch Richdung Berje geschoß.
Was honn se sich gefräät uff die Gletscher unn denne Schnee,
unn vor allem in de Hidde uff denne Jachertee.
Se ware kaum a kumm, kunnt se kenner me halle,
„Uff was fer e Alm solle mer Laafe?“- „Ei, am beschde uff alle!“

De Rucksack gepackt, „e Kard brauche mer net,
awwer e Käschdche Bit orrer Bischoff, das nemme mer met!
E Kombass brauche mer aach net, mer honn jo die Sunn,
bes uff de Ötzi hott bes jetz jeder die Hidde gefunn.
Mer brauche jede Platz fer die flüssiche Sache,
ab unn zu wolle mer jo aach mol e Paisje mache!“

So sinn se gewannert unn gerennt wie e Hersch,
zwische Edelweiß unn Gääse, die dorschdische Bersch.
Unn wie das so is, muschd bei jedem Stopp
e gewissi Meng Algehoool enin in de Kopp.

Daß das uff Dauer net gut geh kunnt bes ins Hodell,
honn se gemerkt uffm Rickweg, unn das ziemlich schnell.
In de ledschde Hidd hots äner aus de Sogge geress,
unn lang wierer war uff de Borrem geschmess.
„Ich kann nimmi unn will nimmi, ich bleib jetz do leie,
wann er wolle kenne ner jo allä ins Daal nunner schdeie.“
Die annere Gäscht honn memme Nodfall gerescheld,
unn dem veuglickte Mann erschd mol Luft zugefesched.
Die Berschwachd geruuf, die war glei zur Stell,
„Druff uff die Säälbahn, unn ins Dorf merrem - schnell!“

Dort kunn der sich dann aach nor selwer kuriere,
wer soll ähm dann do helfe, bei so veele Biere??
„Du bisch doch e Reerer, do musche jetz dorsch,
nestscht Johr geht`s weider, memme annere Borsch!“

Die Mussig schbeelt denne Kraxler zur Ehr,
met Algehol im Kopp wannere, es ziemlich schwer!

De Sell

Jetzt kummts schunn widder so, wie letschdes Johr,
der Sell is wirrer drin, es is ball nimmie wor.
De 18de Geburdsdach, mer kanns kaum erwaade,
mer kann endlich sei eischenie Kischd iwwer die Gasse schwaade.
Awwer bei demm, do honn ich schunn richdich geziddert,
unn mich devor gefärschd, wierer iwwer die Schdroße schliddert.
Wann ich ne als erkannt honn, aus weider Fern,
do hott mer de Schwäöß geschdann uff de Schdern.

Es is dann aach kumm, wies kumme muschd,
sei erschder Insatz war glei e Veluscd.
Zwische Geddebach unn Kollwiller esser gefahr wie e Henger,
awwer irschendwie horrers net uff die Rei kried, met demm Gas unn demm
Lenger.

Die Schdregg war so kurfisch, das war sei schlimmes Los,
sei Corsa kunnt sich ball nimmi halle, uffm Teer vunn de Schdroos.
Er wold nommo druffträde, so richdisch fescd,
weil er gedenkt hot, er wär de Allerbescd!
Deerer doch während de Fahrt nor net so veel vezehle,
sonnern besser sei Audo um die Kurve queele.
Awwer, wie solls dann a annerscd sinn,
er fahrt liwer met seim Karre in e Omega enin.

So e Obbel, der kann awwer einisches vedroh,
ach wann er is met 100 Sache in e annerer gefloh.
Es ware zwar e bissje ingedriggt, die Haub unn die Lambe,
doch mer kundd ne noch redde, aus derer Pambe.

Se honn ne geschbachdelt, geflickt unn geschwäßt,
zwä Daach druff issen schunn werrer dorsch die Landschaft gescheeßt.

Wer jetzt denkt, der Chaot hett sich fer das Johr sunsch nix me geleischt,
der werd jetzt met de negschd Geschicht bidder entdeischt.

Wie mer e Läder uff e Fahrrad nemmt, das es jedem klar,
iwwer die Schuller unn in Fahrdrischdung, so geht`s wunnerbar.
Uns es das klar, bloß ähm halt net,
met dem harre mer mol werrer net gemacht die Wett.

Er war emol allä dehäm, e Pardy kunnt schdeie,
uff e weiblicher Besuch, do kunnt er sich freie.
Aus Angscht vor de Eltre, horrers in sei Schtubb ingeschberrt,
obs freiwillisch gang is? Ich glaab es hott sich eher veerrt.
Es geht mich jo nix oh, uns schbeelt ach kä Roll,
awwer er hott net an de Notfall gedenkt, wierers nausschaffe soll.
Uff ämol hott mer im Hof e Calibra venumm,
wie e Blitz sinn em die schlimmschde Beferschdunge kumm.
„Die Alde sinn so frieh serick,
wann de aweil net abhausch, schlaad mer de Vadder ins Gnick!

Ich fahr bei de Oba e Läder besoje,
wanns net he haut musche halt do schloofe bes Moje.“
Uff de Drohtesel,uff die Aacht, enin in die Garasch,
„Wo hängt dann die Läder vunn deerer Bagasch?“
No langem Suche harrer se endlich gefunn,
unn so lang wie se war uff de Sattel gebunn.
Schwangend isser die Hauptschdross enuff gefahr,
hott links unn rechts die Leid ball aus ere Schlabbe geschlah.

Daß mer e Fahrrad met so me Hinnernis net richdisch kann lenge,
das kann sich normalerweis jeder denge.
Manch äner wird jetzt sahn:“So bled kammer doch net sinn!“
Wahrscheinlich wollder ach das Johr nor werrer in die Kerwered eninn.
Uff jede Fall horrer das Mähre iwwers Fenschder befreid,
sei Eltre harre vunn derer Reddungsaktion nix met kried - bis heit.

Die Mussig schbeeld dem Selle Bersch,
wie mer sieht bische jo net immer so iwwerzwersch.

De Mann uff de Flucht

Wann in Eßwiller Fußball es, das is wie e Fescht,
do werd gescholl iwver die Veleerer unn gesoff uff de Beschd.
Das mer aach im vollgesoffene Kopp werer Hähm muß, es jedem klar.
So es e Reerer vumm Sportplatz Richtung Hinnersee gefahr.

Es gibt awwer noch gresere Vebrecher - unn das iwverall,
in de selb Naachd honn se in Ramschde e Bank iwverfall.
Die Bollizei hott ogefang se suche, e bissje Speerer
unn hott die Täter wahrscheinlich vemudet, unner de brave Reerer.
Se honn sich als meh no denne Reiwer geseht,
wies de Zufall so will sinnse dem Reerer begehnt.

Die honn bei dem Golf an nix Beeses gedenkt,
wie se honn das grie-weiß Audo hinnerm her gelenkt.
De Fahrer vumm VW hott geziddert unn gebeet,
unn aus Angschd, das se ne ohalle es Gas dorchgetreet.
„Wann se mich aweil stoppe es mei Führerschein fort,
do wersche bei uns härder bestrooft, wie beime Mord.“

Wie die Männer in Uniform honn bemerkt die Flucht,
honn se gemähnt, se herre gefunn, wenne se harre gesucht.
„Denne Schwervebrecher derfe mer net entkumme losse,
wammer ne honn mache merm Handschelle an die Flosse.
Denne do losse mer nimmi iwverfalle e Bank,
unn wammer ne misse jahe, bes leer es sei Tank!“

„Ich glaab es is besser wann ich do steh loß mei Kischd,
die Bäh inn die Hand nemm unn Richtung Waadewald flicht.“
Wierer schunn faschd uff de Hauptschdroß war, esser links abgeboh,
unn hott gedenkt ich klobb mol gehe die Balgondeer do dro.

Als em de Hausherr hott die Deer gemacht uff,
hodderm erscht mol vezeelt vunn de Griene unn seim Suff.
Der Mann im Schloofanzuch hott ne inn sei Sauna geschickt,
daß es so aussieht als herrer dert sei Biersche geschliggt.
„Schtellsch der noch paar leere Flasche newer de Saunaofe,
unn mach der kä Gedanke, du erscht mol e Rund schlofe.“
Es war em zwar net so geheier, wie das halt so is,
awwer die Bollizei hott inzwische es Handuch geschmiss.

Die Mussig schbeelt dem Mann uff de Flucht,
wann de die Bollizei siech unn ruhich bleibsch, werrsche a
net gesucht.

Schluß

Das war`s fer heid, ich muß eich dange,
unn langsam werrer vunn derer Läder wange.
Ich hoffe er honn eisch wenischens e bissje amessert,
awwer es war halt a werklich net veel bassert.
Ehr griens jedes Johr gesaad, awwer mache duts känner,
es is jeder ohgeschbroch - die Fraue unn Männer.
Ob klä, ob groß, ob dick orrer dinn,
mer brauche veel me Auswahl fer in die Kerwered enin.
Also schdellen eisch doch wenischens e bissje Doll droh,
damit negschd Johr kann wärre iwwer eisch hergezoh.

Genuch met de Belehrunge, kumme mer wirrer zum schäne,
ich muß grad nommo unser ganze Schdännscher erwähne,
mer honn so zimlich alles, was es Kerweherz begehrt,
unn koschds wasses will, es is alles sei Geld wert.
Die Kerwered uff Blädder es aach wirrer debei,
ehr kenne ruisch aach kaafe, zwä odder drei.

Die Werwung es gemacht, die Red kundd ich halle,
jetz losse mer so richdisch die Sektkorke knalle.
Was soll jetz noch schiefgeh, unn wie sieder dann aus,
Edgar komm mol her, was saaschen zu unserm Schdrauß?
Em Eischän danke mer, daß er hott uns sei Werkstatt iwwerloß,
damit mer kunde knibbele, denne Koloß.

Besser drowwe war hommer gedriggt unn geschwitzt,
wammer ne jetzt noch gedaaft honn, es die Sach geritzt.
Mer kinde uns dasmol fer de Name „Schdrauß Dieder“ entschließe,
unn duhn denne Gedaafde ordentlich begiese.

Ich derf eisch nommo danke, daß ner so uffmerksam wahre,
unn werr langsam mol dicht mache denne Laare.
Eier Hals es beschdimmt drogge vumm veele Lache.
Daß ner was dringe kenne, du ich jetzt Feierowend mache.
Duhn eisch noch ordentlich vekniesche uff derer Gass,
wie ner denne Daach aach vebringe, ich wunsch eisch veel Spaß.

Also:

Tschüß, Servus, Adios unn Goodbye,
ich hoffe er sinn aach Negschdjohr in alder Frische debei.

Zum Abschluß kummts wie jedes Johr,
es Bullsche näwer mer, kreischd nommol vor.